

# RM60,000 bantu 50 keluarga kurang mampu

PONTIAN - Sebanyak RM60,000 diperuntukkan Yayasan Muafakat Pontian (YMP) bagi menjayakan program Smart E-Kasih Shopping pada tahun ini yang melibatkan 50 keluarga.

Pengerusi Lembaga Pemegang Amanah YPM, Datuk Ir Hasni Mohammad berkata, setiap ketua isi rumah akan menerima bantuan RM1,200 yang sah selama 12 bulan bermula Februari tahun ini hingga Februari 2019.

Menurutnya, peruntukan ini tidak diberikan secara tunai tetapi akan dimasukkan ke dalam kad pengenalan ketua isi keluarga bagi membolehkan pemiliknya membeli belah barangan di pasar raya yang ditetapkan.

"Program ini juga membantu mengurangkan kos sara hidup golongan miskin dalam bandar bagi memastikan kebajikan mereka dititikberatkan sejajar dengan objektif penubuhannya.

"Smart E-Kasih Shopping merupakan inisiatif diambil YPM selain beberapa lagi program yang dilakukan bagi membantu golongan kurang bernasib baik dan memerlukan," katanya ketika merasmikan Program Smart E-Kasih Shopping bagi tahun 2018 di pasaraya Econsave di sini,

kelmarin.

Hadirsama Yang Dipertua Majlis Daerah Pontian, Kamalludin Jamal; Ahli Lembaga Pemegang Amanah Yayasan (MyKasih), Datuk Yaacob Md Amin dan Pengurus Operasi Ecosave, Mas Imran Adam.

Hasni yang juga Adun Benut berkata, YPM turut menerima RM463,094 bagi tempoh 2016 hingga 2017 daripada Pihak Berkuasa Tempatan (PBT).

"Sumbangan tersebut merupakan 1 peratus hasil cukai dan bukan cukai, di mana sehingga Februari 2018, sebanyak RM422,067 dibelanjakan untuk faedah masyarakat," katanya.

Katanya, antara sumbangan diberikan ialah bantuan kecemasan kepada mangsa kebakaran dan bencana alam, selain bantuan musim perayaan dan bantuan persekolahan kepada golongan yang layak.



Hasni menyampaikan sumbangan RM1,200 kepada peserta program Smart E-Kasih Shopping di pasaraya Econsave.